



Early Journal Content on JSTOR, Free to Anyone in the World

This article is one of nearly 500,000 scholarly works digitized and made freely available to everyone in the world by JSTOR.

Known as the Early Journal Content, this set of works include research articles, news, letters, and other writings published in more than 200 of the oldest leading academic journals. The works date from the mid-seventeenth to the early twentieth centuries.

We encourage people to read and share the Early Journal Content openly and to tell others that this resource exists. People may post this content online or redistribute in any way for non-commercial purposes.

Read more about Early Journal Content at <http://about.jstor.org/participate-jstor/individuals/early-journal-content>.

JSTOR is a digital library of academic journals, books, and primary source objects. JSTOR helps people discover, use, and build upon a wide range of content through a powerful research and teaching platform, and preserves this content for future generations. JSTOR is part of ITHAKA, a not-for-profit organization that also includes Ithaka S+R and Portico. For more information about JSTOR, please contact support@jstor.org.

ANALECTA.

I. Caelius Aurelianus Celerum passionum 11 30 haec habet, *siquidem vulgus quadam consuetudine propria et dominantia magnis nominibus adpellat, ut magnum mare sacrum mare atque luem deificam epilepticam passionem.* similia uberius exponit Tardarum passionum 1 4, *epilepsia vocabulum sumpsit quod sensum atque mentem pariter adprehendat. adpellatur etiam puerilis passio, siquidem in ipsis (f. istis) abundat aetatibus, et sacra, sive quod divinitus putetur inmissa, sive quod sacram contaminet animam, sive quod in capite fiat, quod multorum philosophorum iudicio sacrum templum est partis animae in corpore natae, sive ob magnitudinem passionis: maiora enim vulgus sacra vocavit; inde sacrum dictum mare et sacra domus, velut tragicus poeta sacram noctem, hoc est magnam, adpellavit.* commentabor de his, eo maxime consilio ut Graecae quae in eis insunt doctrinae vestigia persequar. nam quod ad summam disputationis attinet, id est ad nomen sacri morbi recte explicandum, non potest dubitari quin missa argutula ista grammaticae eruditionis subtilitate sequendum sit verissimum iudicium Hippocratis, qui in ipso libri quam de eo morbo conscripsit initio sic loquitur, *περὶ μὲν τῆς ἱερῆς νόσου καλεομένης ὧδε ἔχει. οὐδὲν τι μοι δοκεί τῶν ἄλλων θειοτέρη εἶναι νόσων οὐδὲ ἱερωτέρη, ἀλλὰ φύσιν μὲν ἔχειν ἣν καὶ τὰ λοιπὰ νοσήματα ὅθεν γίνεται, φύσιν δὲ αὐτῇ καὶ πρόφασιν οἱ ἄνθρωποι ἐνόμισαν θείον τι πρῆγμα εἶναι ὑπὸ ἀπειρίας καὶ θαυμασιότητος, ὅτι οὐδὲν ἔοικε ἑτέρῃσι νόσοισι. καὶ κατὰ μὲν τὴν ἀπορίην αὐτοῖσι τοῦ μὴ γινώσκειν τὸ θείον αὐτῇ διασώζεται, κατὰ δὲ τὴν εὐπορίην τοῦ τρόπου τῆς ἱήσιος ἀπόλνται.* cum Caelio Almelovenus comparavit Aretaeum et Apuleium. quorum ille de causis et signis chronicorum morborum 1 4 ita de epilepsia loquitur, *ἀλλὰ καὶ ἄδοξος ἢ ξυμφορῇ. δοκεί γὰρ τοῖσι ἐς τὴν Σελήνην ἀλιτροῖσι ἀφικνεῖσθαι (ἐφικνεῖσθαι probabiliter Ermerinsius) ἢ νόσος. τούνεκεν ἱερὴν κικλήσκουσι τὴν πάθην· ἀτὰρ καὶ δι' ἄλλας προφάσιος, ἢ μεγέθεος τοῦ κακοῦ (ἱερὸν γὰρ τὸ μέγα), ἢ ἱήσιος οὐκ ἀνθρωπίνης ἀλλὰ θείης, ἢ δαίμονος δόξης ἐς τὸν ἄνθρωπον εἰσόδου, ἢ ξυμπάντων ὁμοῦ,*

τῇνδε ἐκκλησκον ἱερῇν. ubi vereor ne δόξης non satis recte intellexerint interpretes, explicandum autem sit eis quae Hermannus ad Aeschyli Suppl. v. 754 adscripsit. Apuleius haec dicit in Apologia cap. 50, *enimvero si perniciose illa dulcedo intus cohibita et bili atrae sociata venis omnibus furens pervasit, dein ad summum caput viam molita dirum fluxum cerebro immiscuit, ilico regalem partem animi debilitat, quae ratione pollens verticem hominis velut arcem et regiam insedit*. putatur ibi dulcedinis vocabulum corruptum esse, inscruenter admodum. nam antea Apuleius dixerat numquam postea comitali morbo attemptari cui ille pectoris cutem vitiligine insigniverit, scabiem autem Latini propter pruritem et titillationem dixerunt dulcedinem. Cicero de legibus I § 47 de voluptate, *quoque blanditiis corrupti quae natura bona sunt, quia dulcedine hac et scabie carent, non cernunt satis*. Gratius Cynege. v. 408 *at si deformi lacerum dulcedine corpus Persequitur scabies*. similiter Martialis xiv 23 libidinum vocabulo utitur in auriscalpii commendatione, *si tibi morosa prurigne verminat auris, Arma damus tantis apta libidinibus*. deinde Apuleius haec dicit, *eum nostri non modo maiorem et comitalem, verum etiam divinum morbum, ita ut Graeci ἱερὸν νόσον, vere nuncuparunt, videlicet quod animi partem rationalem, quae longe sanctissima est, eam violet*. suspicere Caelium cum illa scripsit memorem fuisse Apuleii. a Caelio, ut passim alia, Isidorus petiit quae Orig. iv 7 5 habet, *epilepsia vocabulum sumpsit quod mentem adprehendens pariter et corpus possideat: Graeci enim adprehensionem ἐπιληψίαν adpellant*. quod mox addit, *idem est et morbus comitalis, idem maior et divinus, quo caduci tenentur*, videtur sumpsisse ab Apuleio. quod autem Caelius epilepticam passionem *luem deificam* dici scribit nihil est aliud quam quod Apuleius *divinum morbum* nuncupari narrat. neque enim mirum est Caelium, Siccensem patria, in isto vocabulo Afrorum secutum esse consuetudinem, quos divina dixisse deifica aliquot exemplis docere possum. Baluzius in Miscellaneorum libro secundo quosdam habet libellos ab Afris saeculo post Christum natum quarto conscriptos in quibus frequens est illud vocabulum. in Passione enim sancti Felicis episcopi Tubyzacensis p. 77 legimus *libros deificos habetis?* ibidem p. 80 *si scripturas deificas tradere nolueris, capite plecteris*. in Gestis purgationis Felicis episcopi Aptungitani p. 85 *dic, inquit, Caeciliano amico meo quod codices accepi pretiosos deificos* XI. ibidem p. 89 *Felicem autem, religiosum episcopum, liberum esse ab exustione instrumentorum deificorum manifestum est, cum nemo in eum aliquid probare potuerit quod religiosissimas*

scripturas tradiderit vel exusserit. omnium enim interrogatio superscripta manifestata est nullas scripturas deificas vel inventas vel corruptas vel incensas fuisse: quae repetit Optatus episcopus Milevitanus de schismate Donatistarum 1 27, ubi scriptum est omnium enim interrogatio superscriptorum manifesta est. possum alia addere, sed vel sic metuo ne nimis longa scriptione molestus fiam.

Cum eis quae Caelius Aurelianus de puerilis morbi nomine dicit comparanda sunt quae Galenus habet in Hippocratis Epidemiarum vi comm. vi cap. 7 (t. v p. 523 Bas. t. ix p. 550 Chart.), *τὴν ἐπιληψίαν οἱ παλαιοὶ καὶ μεγάλην νόσον ἐκάλουν καὶ πάθος παιδίων, ὥσπερ αὐτὸς ὁ Ἱπποκράτης ἐν τῷ περὶ ὑδάτων καὶ ἀέρων καὶ τόπων, ἐπεὶ κατὰ τὴν τῶν παιδῶν ἡλικίαν πλεονάζει.* Hippocratis verba sunt cap. 3, *τοῖσι δὲ παιδίοισι ἐπιπίπτειν σπασμοὺς καὶ ἄσθματα, ἃ νομίζουσι τὸ παιδίον ποιεῖν καὶ ἱερὴν νοῦσον εἶναι.* quo rettulit Foesius *παιδικὸν πάθος* quod apud Erotianum legitur. scripsisse autem videtur Hippocrates *τὸ παιδίον*.

Sacrum morbum vocatam esse epilepsiam propter mali magnitudinem multorum fuisse videtur opinio. paullo scitius quam alii hoc morbi nomen interpretatur scholiastes in Apollonii Rhodii 1 1019, *ἱερὴ δὲ φατίζεται· κατ' εὐφημισμὸν. τὰ γὰρ μεγάλα τῶν παθῶν εὐφήμως ἱερὰ καὶ καλὰ φάμεν, ὥς καὶ τὰς Ἑρινύας Εὐμενίδας καὶ τὴν λοιμικὴν νόσον ἱερὰν, ὥς καὶ Καλλίμαχος "ψευδόμενοι δ' ἱερὴν φημίζομεν."* pingui magis Minerva egerunt qui comitalem morbum ut alia scilicet magna sacrum vocatum esse statuerunt. eis quos antea commemoravi addo Plutarchum, qui de solertia animalium cap. 32 p. 981 sic loquitur, *τὸ δὲ τοῦ ἀνθρώπου θανάσιωτάτον ἐστίν, ὃν Ὅμηρος ἱερὸν ἰχθὺν εἶρηται· καίτοι μέγαν τινὲς οἴονται τὸν ἱερόν, καθάπερ ὁστοῦν ἱερὸν τὸ μέγα καὶ τὴν ἐπιληψίαν μεγάλην νόσον οὔσαν ἱερὰν καλοῦσιν· ἐνιοὶ δὲ κοινῶς τὸν ἄφετον καὶ ἱερῶμενον.*

Omitto alia, neque ea commemoro quae grammatici ut *ἱερὸν ἰχθύν* et *ἱερὸν ὁστοῦν* aliaque similia explicarent disputarunt. sed quoniam sacri ossis mentio facta est utar hac occasione ut epistolam Frontonis ad amicos 1 16, quam ad Victorinum generum scripsit, emendem. eam Maius cum Frontoniana Romae ederet ita scriptam dedit, *Graviter oculos dolui . . nullus dolor . . . aut . . . interis . . . aut internati oriebantur inter nativum, Graeci ieron oston, Suetonius Tranquillus spinam sacram appellat. ego me neque Graecum neque Latinum vocabulum ullius mem-*

bri nosse mallet, dum istius doloris expers vitam degerem. olim initium epistolae aliter scripserat. de quo quid statuendum sit dici non potest antequam veteris libri schedae diligentius exploratae erunt, estque id in Frontonianis reliquiis omnino necessarium. sed *internati*, quod puto Maium aliosque ab internascendo deduxisse, quid sit manifestum fit certa proximorum verborum emendatione. scripsit enim Fronto.. *aut internati oriebantur.* internatium *Graeci* ἱερὸν ὁστοῦν, *Suetonius Tranquillus spinam sacram appellat.* internatii vocabulum adhuc ignorabatur. similia autem sunt multa, quae enumerabo quoniam partim rara sunt et in vetustis tantum glossariis inveniuntur: *intercilium intercolumnium interdigitium interfeminiū interlunium intermetium intermundium internodium internundinium interordinium interpondium interscalmum interscapilium intertignium intervenium.* paullo aliter dicuntur *interpretium* et *interusurium.* iam videat mihi quis quomodo Frontonis verba Reifferscheidius in Suetonii reliquiis p. 273 tractarit: adparebit rem non intellexisse. neque cum Suetonii *spinam sacram* ad librum eius qui erat de vitiis corporalibus rettulit maiore quam saepe alias iure usus est. quippe Suetonius in viris illustribus haec dixit, *Messala Corvinus orator ante biennium quam moreretur ita memoriam ac sensum amisit ut vix pauca verba coniungeret, et ad extremum ulcere sibi circa sacram spinam nato inedia se confecit anno aetatis LXXII.* leguntur ea apud ipsum Reifferscheidium p. 83.

Sed redeo ad Caelium Aurelium. qui cum bis commemoret *sacrum mare*, nescio sane quis ita dixerit, sed Graecum fuisse poetam non dubito. nam *sacra domus* quae additur Homericæ est, Il. vi 89, οἷξασα κληῖδι θυρᾶς ἱέροιο δόμοιο. fuerunt enim grammatici qui hic quoque somnium illud somniarent quo eis quidquid magnum esset sacrum dici posse videbatur. Hesychius ἱεροῖο δόμοιο· ναοῦ, μεγάλου οἴκου. denique tragicus poeta quem Caelius dicit *sacram noctem* hoc est magnam adpellasse Euripides est, cuius *Andromeda* noctis longitudinem conquerebatur, quamquam propterea eam *sacram* adpellasse noctem idem illud grammaticorum somnium est. utitur Euripidiis versibus Mnesilochus Aristophanis in *Thesmophoriazasis* v. 1065 ss.,

ὦ Νῦξ ἱερά,
ὥς μακρὸν ἔππενμα διώκεις
ἀστεροειδέα νῶτα διφρεῖουσ'
αἰθέρος ἱερᾶς
τοῦ σεμνοτάτ' οὐδι' Ὀλύμπου.

erat autem haec Noctis invocatio ipsum tragoediae initium vel, ut scholiastes loquitur, τοῦ προλόγου Ἀνδρομέδας εἰσβολή. sed de his versibus non convenit mihi cum doctis hominibus. Bergkii enim, quem Nauckius sequitur, μακρὸν ὥς ἵππευμα διώκεις scripsit, Meinekii πῶς μακρὸν ἵππευμα διώκεις. dissuadet mutationem scholiastes Theocriti, qui ad idyllium II 166 tres priores versiculos eodem verborum ordine adscripsit quo apud Aristophanem leguntur neque πῶς habet sed ὥς. adfert autem illos versus ut Euripidis neque idonea causa est cur putemus usum eum esse non Euripidis fabula vel antiquioris alicuius grammatici commentario, sed depravato Thesmophoriazusarum exemplari. neque magis idonea causa est cur propter interruptam numerorum continuationem in carmine Euripidis quicquam mutetur. satis enim hiatus excusatur invocatione vel exclamatione, post quam vox paullisper sustinetur. consimile plane exemplum in eisdem anapaesticis numeris praebet Sophoclis Oedipus Coloneus v. 188,

ἄγε νῦν σὺ με, παῖ,
 ἔν' ἂν εὐσεβίας ἐπιβαίνοντες
 τὸ μὲν εἴποιμεν, τὸ δ' ἀκούσαιομεν,
 καὶ μὴ χρεῖα πολεμῶμεν.

et magis ibi cohaeret oratio quam in Euripidiis versibus. deinde Nauckius ἀστεροειδέα delendum esse suspicatur, neque nego insolentius dictum esse, cum νῶτα αἰθέρος plena quidem sint sideribus, sed non speciem vel similitudinem eorum habeant. firmat tamen illam vocem scholion Theocriteum, in quo levi errore ἀστεροειδέα scriptum est. firmant etiam Ennii versus apud Varronem de lingua Latina v p. 29 Sp., quos versus ad Andromedam Ennii Iosephus Scaliger rectissime rettulit, immerito reprehensus a Gerharo Vossio in Castigationibus p. 19. Ennius igitur ita dixit,

quae cava caeli signitenentibus
 conficis bigis.

si signitenentis scripsisset, accuratius imitatus esset Euripidem: sed videtur νῶτα de equorum dorso intellexisse, excusando errore similique aliis quos Latini in Graecorum carminum interpretatione commiserunt; certe ad bigas epitheton transtulit. ceterum signitenentibus illud Matthias Gesnerus in Thesauro non recte ita exponit, 'id est signa percurrentibus;' nam illa cursum tenendi significatio a composito vocabulo aliena est. immo signitenentes bigae similiter dicuntur atque Annali x (v. 343 Vahl.) hinc Nox processit stellis ardentibus apta, Annalique xvi (v. 416) Nox quando mediis signis praecincta volabit. ἀστεροειδέα

autem illud eo minus mihi videtur esse sollicitandum quo magis vereor ne, si composita tragicorum adiectiva omnia ad vivum resecanda esse censeamus, aliquam multa nobis mutanda sint aut prorsus delenda. itaque dabimus aliquid poetarum libertati putabimusque Euripidem *ἀστεροειδέα νῶτα* dixisse cum vellet *ἀστερόεντα* vel *ἀστερώδη* intellegi. scio Loebekium in Pathologia Graeci sermonis t. i p. 458 ss. de *ᾠδης* et *οειδής* formarum discrimine egregie disputasse: sed grammaticam subtilitatem saepe neglexit liberior atque audacior Graecorum poetarum oratio.

II. Diu, quod paene mireris, reprehensionem novandique studia effugerant splendida Antigoniae verba in Phoenissis Euripidis v. 174, *ὦ λιπαροζώνου θύγατερ Ἀλίου Σελαναία, χρυσεόκυκλον φέγγος*. nuper autem Badhamus, cum vulgo constet ac pueris adeo notissimum sit communi Graecorum opinione Lunam Solis non filiam sed sororem perhiberi, puerili eruditione confisus *Ἀλίου* vel *ἁελίου* (id enim libri habent, illud Hermannus verissime scripsit) minime tolerandum, sed in *Ἀαιοῦς* mutandum esse censuit. tum Nauckius ruiturum isto pacto versiculum addito articulo fulsit continuoque, quasi res esset certissima, *θύγατερ ἃ Ἀαιοῦς* in exemplaria tragoediae intulit. detrahi hac mutatione orationi aliquid poeticae virtutis facile intellegitur: nam multo quam Latona melius ac significantius Sol dicitur *λιπαρόζωνος*, id est radiis veluti nitido cingulo circumdatus. magis etiam emendandi libidinem cohibere debebat antiqui interpretis scholion, *Ἡσιόδός φησιν ἀδελφὴν Ἥλιου εἶναι τὴν Σελήνην, "Θεῖα δ' Ἥελιόν τε μέγαν λαμπράν τε Σελήνην γείνατο."* *Ἀισχύλος* δὲ καὶ οἱ φυσικώτεροι *θυγατέρα*, *παρόσον ἐκ τοῦ ἡλιακοῦ φωτὸς μεταλαμβάνει ἁμέλει καὶ πρὸς τὰς ὑποστάσεις μεταμορφοῦται ἢ σελήνη*. itaque similiter atque Euripides etiam Aeschylus alicubi Lunam filiam Solis vocavit. verum Nauckius Trag. fragm. p. 99 'non *Ἀισχύλος*' inquit 'voluisse videtur grammaticus, sed *Εὐριπίδης*?' non intellego cur voluerit, nisi forte ne, si nollet, periculosius esset Badhamo et Nauckio emendandi studium. sed ignorarunt docti homines quod scholiastes Arati in v. 455 narrat, *αὐτὴ δὲ ἡ σελήνη καθ' ἑαυτὴν ἄφαντος ἡμῖν ἐστίν, ὑπὸ δὲ τοῦ ἡλίου φωτιζομένη φανερὰ ἡμῖν γίνεται, καὶ ὅτε μὲν αὐτῇ πλησιάζει, τότε καὶ φαίνεται, ὅτε δὲ αὐτοῦ χωρίζεται, κατ' ὀλίγον ἀπολήγει, καὶ πάλιν ὅσον πλησιάζει γεννᾶται· διὸ καὶ παρὰ τοῖς τραγικοῖς Ἥλιον θυγάτηρ λέγεται, ἐπειδὴ τὸ φῶς ἐξ αὐτοῦ ἔχει*. nulla ratio est qua evincas unius tantum Euripidis illum versiculum obversatum esse scholia-

stae. sed esto, cogitaverit tantum de Euripide: vel sic illius carmini testimonium accedit nostris exemplaribus multo antiquius; quod sine evidenti necessitate contemnere non artis est, sed libidinis extra legitimos disciplinae fines temere evagantis. atqui nulla plane est contemnendi necessitas. nam cum omnino ineptum sit veteres poetas quasi essent catechumeni dogmatum vel Hesiodi theogonia vel communi opinione praescriptorum fide adstringere, tum tragici in rebus quae ad religionem pertinent liberius saepe philosophati sunt, physice maxime, neque Aeschylus tantum hoc fecerunt et Euripides, sed interdum etiam Sophocles. nimiam enim sibi sapientiam adrogat qui Sophocles esse negat versus qui in vita Arati a Victorio edita ei tribuuntur, *Ἥλι', ἀλλ' οἴκτειρέ με, Ὅν οἱ σοφοὶ λέγουσι γεννητὴν θεῶν Πατέρα τε πάντων*. quae ita scripsi non quod certo ita emendanda esse putarem, sed ne repeterem quod vulgo scribunt *Ἡέλιος οἴκτειρεί με*: neque enim istam nominis formam senarius versus admittit. deinde cum copula deesset, *τε* adicere malui quam *καὶ πατέρα* scribere. credit autem illa Sophoclia esse prudentissimus harum rerum iudex Lobeckius Aglaoph. p. 79. sed multo sane saepius ita philosophati sunt Euripides et antea Aeschylus. quem cum Herodotus II 156 narret Dianam fecisse filiam Cereris, multo minus mirabimur eundem Lunam Solis, a quo lucem accipit, aliquando dixisse filiam Euripidemque hoc esse imitatum. itaque in Phoenissis veteribus testibus fidem habebimus neque illud *θύγατερ Ἀλλίου Σελαναία* novitio aliquo commento commutabimus.

Videtur autem mihi omnino priscis testibus maior quam saepe fit reverentia esse exhibenda, non ut addicti eis simus aut nihil tempore valde antiquo erratum esse putemus, verum ut caute ac modeste iudicemus nostrisque opinionibus minus confidamus. sic idem Badhamus cuius de versu Euripidis sententiam improbandam esse duximus attrectavit temere quae apud Platonem leguntur in Phaedro p. 245, *ὅς δ' ἂν ἄνευ μανίας μουσῶν ἐπὶ ποιητικὰς θύρας ἀφίκηται, πεισθεὶς ὥς ἄρα ἐκ τέχνης ἱκανὸς ποιητὴς ἐσόμενος, ἀτελὴς αὐτὸς τε καὶ ἡ πόλεις ὑπὸ τῆς τῶν μαινομένων ἢ τοῦ σωφρονοῦντος ἡφανίσθη*. putat enim scribendum esse *ἐπὶ ποιητικῆς θύρας*. sed quod in nostris libris est neque non potest ferri legit etiam Seneca, qui de tranquillitate animi cap. 17 10 *nam sive Graeco poetae credimus inquit, aliquando et insanire iucundum est, sive Platoni, frustra poeticas fores conpos sui pepulit, sive Aristoteli, nullum magnum*

ingenium sine mixtura dementiae fuit. vel, ut alio exemplo utar, versum Sophoclis *ἔδοξάτην μοι τῷ δὴ ἡπείρω μολεῖν* Nauckius Trag. fragm. p. 255 suspicatur non Sophoclis esse, sed comici poetae qui Aeschyli verba *δύο γυναικ' εὐείμονε* in risum verterit. equidem nihil hic ridiculi adgnosco, versum autem illum non tantum scholiastes in Aeschyli Persarum v. 181, verum etiam quem ipse Nauckius commemorat Herodianus in Philetaero p. 434 Piers. Sophocli tribuit: satis igitur confirmatum est poetae nomen. eiusdem Herodiani gravissima auctoritate Aristophanis versum a suspicione defendo. in Avibus enim v. 1131 Pithetaerus muri quem exstructum esse audit altitudinem admirans exclamat *ὦ Πόσειδον, τοῦ μάκρους.* ibi scholiastes adscripsit *σημειῶσαι ὅτι τὸ μάκρος λέγει.* Guilelmus Dindorfius 'vocabulum' inquit 'fortasse ab Aristophane fictum: nisi τοῦ μακροῦ scripsit.' mihi τοῦ μακροῦ hic ne potuisse quidem commode dici videtur, μάκρος cur Aristophanes finxerit causa non adparet. Meinekios hoc adscripsit, 'μάκρους corruptum est.' fugit doctos homines quod ex Herodiani Iliaca prosodia scholia in Iliadis xxiii 419 adferunt, *βαρυντονήτεον τὸ στῆνος, ἐπεὶ οὐδὲν οὐδέτερον ὄνομα εἰς ὅς λῆγον ὀξύνεται. οὕτως εἶχε καὶ τὸ μάκρος παρ' Ἀριστοφάνει, "ὦ Πόσειδον, τοῦ μάκρους," βαρυνόμενον καὶ μὴ ὁμοτονοῦν τῷ ὀξυνομένῳ ἀρσενικῷ.* abstinēbimus, opinor, a mutatione vocabuli quod Herodianus testatur. ceterum τὸ μάκρος hodie Graeci dicere solent, ut docet Coraes in Heliodorum p. 132, commemoratus ille a Ludovico Dindorfio in Thesauro Stephani, *τῷ μῆκος ἢ μὲν συνήθεια σπανίως κέχρηται, ἐπιπολάσαςτος ἐν αὐτῇ τοῦ μάκρους.* idem sermonis vitium (repugnat enim τὸ μάκρος analogiae) non dubito iam Aristophanis aetate plebeculam Atticam commisisse. Pithe-taeus igitur eius cum eo vocabulo utitur, prae magna admiratione in sordes verborum ridicule incidit, neque mutandum est quod poeta facete instituit.

III. Egregium carmen Aeschyli est in Agamemnone v. 681 ss.,

*τίς ποτ' ὠνόμαζεν ὦδ' ἐς τὸ πᾶν ἐτητύμως
(μὴ τις ὄντιν' οὐχ ὀρώμεν προνοίαισι τοῦ πεπερωμένου
γλῶσσαν ἐν τύχῃ νέμων;)
τὰν δορίγαμβρον ἀμφινεικῇ θ' Ἑλέναν, ἐπεὶ περὶ πόντως
ἐλένας ἑλανδρος ἐλέπτολις
ἐκ τῶν ἀβροτίμων
προκαλυμμάτων ἔπλευσε Ζεφύρου γίγαντος αἶρα,*

πολύανδροί τε φεράσπιδες κυναγοὶ κατ' ἔχνης πλάταν
ἄφαντον

δι' ἔριν αἱματόεσσαν.

cum ἑλένας vocabulum Aeschylus finxit (recte enim ita correxerunt Blomfieldus et Elmsleius ἑλένας quod libri habent), usus est ea nominum interpretandorum consuetudine cuius multa exempla Elmsleius ad Euripidis Bacch. v. 508 adscripsit, vim et rationem praeclare exposuit Hermannus in explicatione Aiacis Sophocliae v. 430. eadem autem nominis interpretatio momentum fecit ut Helenae sidus perniciosum salutaribus fratrum sideribus adderetur. nam cum aliis Helena videretur esse ναυτίλοις σωτήριος, ut Euripides loquitur in Oreste v. 1637, alii et fortasse plures eam infestam navibus esse existimabant. de qua re componam hic quae repperi omnia. itaque ad Euripidis Orestem adscriptum habemus hoc scholion, quod multo ante Cobetum tempore Madvigius correxit in Emendationibus in Ciceronis libros philosophicos p. 137, ὅτι καὶ ἡ Ἑλένη τοῖς χειμαζομένοις κατὰ θάλασσαν ἐπήκοός ἐστι κατὰ Εὐριπίδην σεσημειώται· ὁ μέντοι Σωσίβιος ἔμπαλιν οἶεται οὐκ εὐμενῶς αὐτὴν ἐπιφαίνεσθαι. Πόλεμων δὲ καὶ ἐν τῷ δ' τῶν (sic Madvigius: libri ἐν τῷδε τῷ) πρὸς Ἀναξανδρίδην τὴν μὲν τῶν δύο ἀστέρων ἐπιφάνειαν τῶν Διοσκουίδων ἀνομολογεῖσθαι (ἀνωμολογῆσθαι Cobetus), τὴν δὲ τῶν γ' τῶν (sic Madvigius: γ' τῶν libri omittunt) λεγομένων Καβείρων (sic Madvigius: libri Ζοβείρων). in brevius haec contracta sunt in codice Augustano, Σωσίβιος ἐπὶ κακῷ αὐτὴν οἶεται φαίνεσθαι· εἰδὼς οὖν σωτήριόν φησιν αὐτὴν ὁ Εὐριπίδης, ubi εἰδὼς non puto verum esse, sed scribendum ἰδίως, frequentatum grammaticis vocabulum, a quo ne Latini quidem magis abstinent quam ab aliis Graecae disciplinae vocibus. in scholiis Bobiensibus in Ciceronis orationem in Vatinius p. 316 11 Or. Maius testatur codicem evidenter hoc habere, ad superbiam quidem et nimium tumorem animi referens hoc dixit κατῶς; tamen notare voluit insulsiatatem cervicum eius, quas immodicum fuisse corpulentas traditur: habet codex sine dubio ΙΔΩC, coniungendumque est ἰδίως tamen. cum Sosibio consentit Plinius Nat. hist. II § 101, existunt stellae et in mari terrisque. vidi nocturnis militum vigiliis inhaerere pilis pro vallo fulgorem effigie ea, et antemnis navigantium aliisque navium partibus ceu vocali quodam sono insistent ut volucres sedem ex sede mutantes, graves cum solitariae venere mergentesque navigia et si in carinae ima inciderint exurentes, geminae autem salutares et prosperi cursus praenuntiae, qua-

rum adventu fugari diram illam ac minacem adpellatamque Helenam, et ob id Polluci et Castori id numen adsignant eosque in mari deos invocant. usus est his Plinianis Ioannes Lydus cum de ostentis cap. 5 haec scripsit, ὁμοίως ἔστιν ἑτέροισ ἀστέρας εὐρεῖν ποτὲ μὲν ἐν γῇ, ποτὲ δὲ ἐν θαλάττῃ τὰς ἰδίας ἐνεργείας δεικνύντας. ἐπὶ τε γὰρ στρατιωτικῶν ἀκοντίων πολλάκις ὤφθησαν ἐφριζάνοντες ἐπὶ τε τῶν ἰστίων τῶν νεῶν, καὶ ἐν ἄλλοις δὲ μέρεσιν, λιγυρόν τι σύριγμα προσηχοῦντες καὶ ὀρνέων δίκην εἰς τόπον ἐκ τόπου τῆς νεῶς μεθιστάμενοι, ὥς ἂν καταδύσωσι ταύτην. ὁθεν καὶ τοῖς ξηροτέροις τῆς νεῶς ἐμπέπτουσι μέρεσιν, ἐξ ὧν συντομωτέραν εἰκὸς γενέσθαι τὴν ἐκπύρωσιν. τὸ δὲ τοιοῦτον σχῆμα ἦτοι κατάστημα οἱ τὴν θάλατταν πλέοντες Ἑλένην κολοῦσιν. ἀλλὰ κἀνταῦθα τὰ ἐξ αὐτῆς ἢ πρόνοια δεικνύσι· δύο γὰρ ἀστέρες εὐθὺς κατασκήπτουσι τῆς τοιαύτης φορᾶς, οὓς Κάστορα καὶ Πολυδεύκην κολοῦσιν, οἱ παραχρῆμα πρὸς φυγὴν τὴν λεγομένην ἐλαύνουσιν. porro Statii sunt hi versus in Thebaide vii 791 ss., non aliter caeco nocturni turbine Cori Scit peritura ratis, cum iam damnata sororis Igne Therapnaei fugerunt carbasa fratres. quorum Lactantius hanc dedit interpretationem, sororis igne: quia nautae cum stellam Helenae viderint, quae urania dicitur, cuius tanta est vis incendii ut malum et navis ima pertundat, ut etiam si aes sit hoc calore solvatur, ergo si haec stella navi insederit, sciunt se nautae sine dubio perituros: contra Castorum sidera sunt navigantibus salutaria. uraniam hanc stellam dixit etiam Olympiodorus Thebaicus, ex cuius historia Photius in Bibliotheca p. 62^a Bekk. haec excipit, ὅτι κατὰ θάλασσαν πολλὰ παθῶν ὁ συγγραφεὺς μόλις διασώζεται. ἐν ᾧ καὶ περὶ ἀστέρος τινὸς τερατολογεῖ, ἐπιβρίσαντος τῷ ἰστίῳ τοῦ πλοίου, μέλλειν αὐτοὺς βυθίζεσθαι· οὐρανίαν δὲ τὸ φανὲν παρὰ τῶν ναυτῶν καλεῖσθαι. ubi μέλλειν intellegi nequit, verum esse potest quod Niebuhrius scribendum esse coniecit μέλλον, nominativus quem dicunt absolutum. ceterum, ut ex Stephaniano Thesauro didici, alia etiam et paullo diversa significatione οὐρανίαν dictam esse adparet ex Olympiodori Alexandrini commentariis meteorologicis p. 4^b Ald. (apud Idelerum t. i p. 135), τούτους δὲ τοὺς τυφῶνας καὶ σίφωνας καλοῦσι διὰ τὸ καὶ ὕδωρ πολλάκις ἀναρπάσαι. καλοῦσι δὲ αὐτὴν καὶ οὐρανίαν ἰδιωτικῷ ὀνόματι. τυφῶν δὲ καλεῖται διὰ τοῦ τάχους τοῦ πνεύματος. διὰ γὰρ τοῦτο καὶ ὁ ποιητὴς φησι καὶ τὰς ἀέλλας καὶ τὰς συστροφὰς τῶν πνευμάτων. poetam dicit Hesiodum in Theogonia v. 869ss. de Typhoeo

narrantem. sed ne a typhone quidem ignem abesse multorum fuisse constat opinionem.

IV. De Palicis olim Cluverius in Sicilia antiqua, nostra memoria Hermannus in commentatione de Aeschylī Aetnaeis, Prellerus in Pemonis reliquiis, Schneidevinus in museo Rhenano anni MDCCCLV erudite disputarunt. fugerunt eos quae Iulius Firmicus Maternus in praefatione libri Matheseos primi scripsit. ea adferam ut simul, si possum, emendem. *sed posteaquam de actibus et processibus nostris confabulati sumus, scrutatus a me es, sicut meministi, totius Siciliae quam incolō situm et unde oriundus sum* (scribendum puto *quam incolō et unde oriundus sum situm*) *et omnia quae veteres fabulae prodiderunt cum verae rationis explicatione quaesisti; quid velit ex se Scylla quidve Charybdis, quid concurrentium in freta fluctuum turbulenta confusio, quos disiuncta ac separata maria certo horarum tempore ac spatio contraria undarum collisione coniungunt; quid faciant ignes qui ex Aetnae vertice erumpunt, quae natura eorum quaeve substantia, ex qua origine sine iactura montis tanta proficiscantur et anhelent incendia; qualis sit lacus qui prope alveum Symaethi amnis ostenditur, cui Paliscus (scr. Palicus) nomen est, qui semper crassitudine lurida sordidus viventibus spumis obatrescit et strepente coniugio stridulus argutum murmur exibat. nihili esse patet coniugio, cui Prucknerus vitii notam adposuit: videtur autem mihi Firmicus scripsisse confligio, quo vocabulo Solinus utitur cap. 9 9, nam in latebrosis rupium cavaminibus quae fluctuum configiis tunc adesa sunt reduviae conchyliorum resederunt. addo de lacu et fontibus Palicorum memorabilia non nulla habere Iosephum Allegranzam in disputatione de Palicis (*Opuscoli eruditi latini ed italiani del p. m. Giuseppe Allegranza, Cremona MDCCCLXXXI*) p. 203 ss. commemorat is p. 206 ea quae Boccatus in Genealogia deorum II 10 de lacu seu fontibus Palicorum auctore Theodontio rettulit. Theodontius iste Leontius est cuius librum Bodius in Mythographis edidit.*

V. Apud M. Claudium Sacerdotem Artium grammaticarum I 153 versus latent duo ioculares, non certi alicuius poetae, sed quales populus Romanus iacere solebat. loquitur de asteismo qui per similitudinem fiat. *per similitudinem, quomodo dictum est de Carbone, qui mortuo Crasso, homine felice, inimico suo, ante obscurus florere coepit, 'postquam Crassus carbo factus est', id est periit, 'Carbo crassus factus est.' et illud de Pompeio, qui coloris erat rubei, 'quem non pudet et rubet, non est homo, sed ropio.' ropio autem est aut minium aut piscis robeus aut penis.* in libro Bobiensi *mimum* et pene scriptum est, *mi-*

nium et *penis* Vindobonenses posuerunt, quorum illud certum est, hoc veri saltem simile. prior versiculus quadratus est,

postquam Crassus carbo factus, Carbo crassus factus est,
explicationi eius grammaticus aliena et falsa admiscuit. recte autem Vindobonenses meminerunt C. Papirii Carbonis, qui, ut Cicero de or. III § 10 ait, inimicissimus fuit L. Licinio Crasso: quippe Crassus patrem eius accusatione eo adegerat ut mortem sibi ipse conscisceret. habebat Carbo ille cognomen Arvinae, commemoratum a Valerio Maximo IX 2 3. quod cognomen ei propter pingue corpus a vulgo iocose additum esse non dubito. quodsi vero supra modum pinguescere coepit post mortem Crassi, versiculus ille ex omni parte facetus est. periit autem Crassus anno ab u. c. DCLXIII, Carbo trucidatus est anno DCLXXII. alter versiculus Sotadeus est, soluta ultima arsi,

quem non pudet et rubet, non est homo, sed ropio.

commode meminerunt Vindobonenses eorum quae Suetonius narrat de grammaticis cap. 15, *Lenaeus Magni Pompeii libertus . . . tanto amore erga patroni memoriam extitit ut Sallustium historicum, quod eum oris probi, animo inuerecundo scripsisset, acerbissima satura laceraverit.* adparet animi inuerecundi commemorationem qua Claudius Sacerdos usus est sumptam primitus esse a Sallustio. os probum Pompeii memorat etiam Plinius Nat. hist. VII § 53 et XXXVII § 14. denique pertinent huc quae Seneca narrat Ep. 11 4, *nihil erat mollius ore Pompeii. numquam non coram pluribus rubuit, utique in contionibus.* utrum *ropio* sit *rubellio* Plinii an aliud significetur non diuidico. nullus barbatus a Gallis *rouget* dicitur.

VI. Difficile est ea emendare (sunt autem plurima) quae in Apuleii libris post multos multorum et partim valde doctorum hominum labores nondum recte scripta sunt. nam praeter monstrosa saepe ipsius Florentini exemplaris vitia certam emendationem haud raro impedit mirabile illud et quasi luxurians dicendi genus cui se totum dedit scriptor et antiquarius et simul verborum novator. sed cavendum tamen est ne ei attribuamus quae scribere non potuit nisi nimium ei libebat ineptire. sic ineptum est quod vulgo legitur in Floridorum initio *caespes libamine fumigatus* frustra que fuerunt qui id tueri sibi visi sunt adlatis dissimilibus. contra verissimum est quod in libro Florentino a prima manu scriptum est *caespes libamine umigatus*. in Onomastico vetusto apud Labbaeum p. 86^a legimus *humigatus* *βεβρεγμένος*. est autem illis glossariis diligenter utendum siquis operae pretium facere vult in emendandis atque interpretandis Apuleii scriptis.

multa tamen sine omni doctrinae adparatu expediri possunt. quorum non nulla hic proferam.

Floridorum III 17 p. 82 haec legimus, *et merulae in remotis tesquis fringultiunt, luscinae in solitudine Africana canticum adolescentiae garriunt, olores apud avios fluvios carmen senectae meditantur: enimvero qui pueris et adolescentibus et senibus utile carmen prompturus est in mediis milibus hominum canat.* merito Oudendorpius offensus est illa solitudine Africana: intellexit enim dici aliquid debuisse quod cum remotis tesquis aviisque fluviis congrueret. et per se iam illud absurdum est. nuper scriptum est *in solitudine aprica*. quo commento nihil sane eiusmodi restituitur quale necessarium est, contra exhibentur nobis luscinae aprica loca quaerentes. verum hodie certe umbram amant et opaca virgulta, neque, puto, olim aliter fecit *χλωρηὶς ἀηδὼν δεινδρέων ἐν πετάλοισι καθεζομένη πυνκίνοισιν.* non magno acumine opus est ut intellegatur Apuleium scripsisse *luscinae in solitudine arcana canticum adolescentiae garriunt.*

Floridorum IV 18 p. 91 ita in libro Florentino scriptum est, *nunc quoque igitur principium mihi apud vestras auris auspicatissimum ab Aesculapio deo capiam, qui arcem nostrae Carthaginis indubitabili numine propitius strepit.* hic primum *vestrae Carthaginis* cum Colvio scribendum est. tum frustra laborarunt docti homines ut ineptum illud *strepit* emendarent. quorum is nimium sibi placuit qui verum se restituere credidit si *tegit* faceret ex illo *strepit*. non dubitandum est scripsisse Apuleium *saepit*. eodem modo olim docui in epistula M. Caesaris ad Frontonem III 9 scribendum esse *ipsum lucum qui Capitolium montem saepit*: ibi quoque *strepit* est in libro Bobiensi, certe apud Maium. non abhorret autem a figurata Apuleii oratione quod saepire urbem dicitur deus quam custodia sua quasi cingat et circumvallet.

Apologiae cap. 3 p. 383 non plena est oratio in his, *propter quod paullo prius patroni Aemiliani multa in me proprie conficta et alia communiter in philosophos sueta ab imperitis mercennaria loquacitate effutierunt.* sed errare eos puto qui *sueta* in aliud participium mutandum esse suspicantur, omnium autem minime probo quod nuper prolatum est *consuta*. intercidisce infinitivum, sive is *finigi* fuit sive simile aliquid, non dubitabit qui reputaverit in Apuleii libris et maxime in hac ipsa Apologia saepius syllabas et verba librariorum negligentia omissa esse. demonstrabo rem novis exemplis duobus.

Cap. 85 p. 570s. Apuleius, si reddimus ei quod scripsit, ita loquitur, *tune, ultime, parentis tuae animum* insistis scrutari, *oculos ob-*

servas, suspiritus numeras, adfectiones exploras, tabulas intercipis, amorem revincis? tunc quid in cubiculo agat perquiris? tibine mater tua non dico amatrix, sed nec omnino femina est? ne tu in ea cogites nisi unam parentis religionem. ubi tibine posui solum erat ne. illud Apuleium scripsisse et necessaria sententia docet et recta atque cum reliqua oratione congruens forma qua ea sententia enuntianda erat: pudet autem refellere quae alii opinati sunt. antea vero, ubi in istis scrutaris legebatur, scripsi insistis scrutari: neque enim quicquam prodest in delere.

Cap. 96 p. 590 ita scribendum est, neque enim dubito, *litteras tamen quas ad me Carthagine vel iam adveniens ex itinere praemisit, quas adhuc validus, quas iam aeger, plenas honoris, plenas amoris, quaeso, Maxime, paullisper recitari sinas, ut sciat frater eius, accusator meus, quam invita in omnibus Minerva curriculum cum fratre, optimae memoriae viro, currat. missis hominum doctorum miraculis invita inserui, quod librarius oculis ab uno in ad alterum aberrantibus omisit; quo facto Minerva in Minervae, quod libri habent, depravatam est.*

His addo quid de aliis Apologiae verbis, quae leguntur cap. 73 p. 547, sentiam: sed adscribam potius statim correctam. *mox auditorio misso Pontianus eo principio me adortus consensum publicae vocis pro divino auspicio interpretatur aperitque consilium sibi esse, si ego non nolim, matrem suam, cui plurimi inhient, mecum coniungere (mihi quoniam soli ait rerum omnium confidere sese et credere), ni id onus respuam, quoniam non formosa pupilla, sed mediocri facie mater liberorum mihi offeratur: si haec reputans formae et divitiarum gratia me ad aliam condicionem reservarem, neque pro amico neque pro philosopho facturum. ubi respuam scripsi scribebatur recipiam, quod contrarium est sententiae, leniore autem quam qua feci non potest corrigi emendatione. etiam hic a redarguendis levibus et nugatoriis opinionibus abstineo.*

VII. Ambrosius in psalmum cxviii sermone xvi § 41 s. haec commentatur. *diximus continentiam sensus, nunc de topazio lapide exprimamus (f. expromamus) historiam. de quo invenimus in historia Xenocratis, qui scripsit quasi lithognomon (ita libri non nulli: vulgo lithosnomon), nasci vel inveniri circa Thebaidis civitatem Alabastrum vel Topazion, ut aliqui putant, unde et nominatus est ab eo in quo gigneretur loco. sunt autem qui putaverint insulam nuncupari Topazion, ad quam adpulsos Troglodytas orta subito commotione maritima eo quod navium usum non haberent regredi nequivisse. deinde plurimo*

immorantes tempore in insula invenisse lapidem et delectatos colore eius repetiisse domum et Arabis negotiatoribus advenientibus vendidisse; ab illis emisse Philonem et ad matrem Ptolemaei secundi, cui nomen erat Berenice, ab ipso esse perlatum, illam autem, quamvis regalibus ornamentis abundaret, supra modum tamen colore eius stupefactam elaborasse ut diutius species tam pretiosi lapidis non lateret, ideoque studio eius quaesitum lapidem in usus frequentiores venisse. diximus quomodo innotuerit topazion lapis, nunc expressius de eius qualitate dicamus. duorum colorum est in hoc lapide κρᾶσις, hoc est quaedam temperata permixtio, πρασσειδής (legitur πραποιδής) et chrysopteros (legitur chrysopa) similis chrysoprasso, secundum utrumque velut quaedam extendens colorum figuras, et plenius quidem a peritis fertur extendere. est autem prasochrus (libri parichrus) et chrysochrus et pinguis, resplendenti similis, maxime cum solis splendore percutitur. est etiam pulcherrimus et mirabilis super omnes chrysoprasos magnitudine et, ut dixi, visu pinguior; natura huiusmodi ut si polire et levigare eum velis asperetur magis, et usu minuitur. est autem quodam genitili opere naturae euglyphus, hoc est bene insignitus, atque mirabilis et ut summo studio dignus haberetur difficile invenitur et repertus raro tamen in usu hominum est, quasi is quem dives regina mirata sit. quae in his correxi ita emendanda fuisse satis certum est. nam πρασόχρους vocabulum etsi lexica Tzetzae tantum Chil. viii 969 ss. auctoritate firmant, nulla tamen causa est quin putemus usum eius multo fuisse antiquiorem. πρασσειδής et chrysopteros confirmantur a Plinio. comparanda est enim Ambrosii narratio cum eis quae Plinius habet Nat. hist. xxxvii § 107 ss. egregia etiamnum suo topazo gloria est, virenti genere et cum reperta est praelatae omnibus. accidit in Arabiae insula quae Cytis vocabatur, in quam devenerant Trogodytae praedones fame et tempestate fessi, ut cum herbas radicesque foderent eruerent topazon. haec Archelai sententia est. Iuba Topazum insulam in rubro mari a continenti stadiis ccc abesse dicit, nebulosam et ideo quaesitam saepius navigantibus ex ea causa nomen accepisse, topazin enim Trogodytarum lingua significationem habere quaerendi. ex hac primum inportatam Berenicae reginae, quae fuit mater sequentis Ptolemaei, ab Philone praefecto regis mire placuisse et inde factam statuam Arsinoae Ptolemaei philadelphia uxori quattuor cubitorum, sacratam in delubro quod aureum cognominabatur. recentissimi auctores et circa Thebaidis Alabastrum oppidum nasci dicunt et duo genera eius faciunt, prasoiden atque chrysopteron simile chrysoprasso: tota enim similitudo ad porri sucum

dirigitur. est autem amplissima gemmarum. eadem sola nobilium limam sentit, ceterae Naxio et cotibus poliuntur; haec et usu atteritur. adparet Plinium partem eorum quae dicit a Xenocrate petiisse, Xenocratem partim cum Iuba conspirasse. cum autem Xenocrates a Plinio recentissimorum auctorum nomine comprehendatur, non absurde putabimus usum eum esse Iubae narratione. commemorat vero Plinius Xenocratem eodem libro xxxvii § 25, ubi Ephesium dicit, 27 37 40. non scripsisse eum librum de lapidibus inde patet quod ab Ambrosio dicitur scripsisse quasi lithognomon: nimis enim tum ineptum foret *quasi* illud. immo in historia Xenocratis quae narrat se invenisse Ambrosius dicit. itaque eo adducimur paene ut eundem esse Xenocratem putemus cuius memoria extat in Etymologico magno p. 157 51, *Ἀσσυρία, ἡ Βαβυλωνία. τὸ μὲν πρῶτον ἐκαλεῖτο Εὐφράτις, ὕστερον δὲ Χαλδαία, τὸ τελευταῖον δὲ ἀπὸ Ἀσούρου τοῦ Σούσου Ἀσσυρία, ὡς Ξενοκράτης ἐν πρώτῳ Χρονικῶν.* neque enim mirum videri posset si eruditus homo in libris quibus orientis historiam aut tractavit aut attigit de pretiosis lapidibus multa narrasset. sed veri sane non dissimile est quod Carolus Muellerus Fragn. histor. Graec. t. iv p. 530 conicit, in Etymologico *Ξεναγόρας* esse scribendum: Xenagorae enim Chronica saepius commemorantur.

Sed quod Plinius topazum solam nobilium gemmarum limam sentire scribit in mentem mihi revocat alia eius verba quae emendatione indigent. eodem enim libro xxxvii § 199 haec vulgo leguntur, *decussi fragmenti quod in lamna ferri moratur efficacissimum experimentum excusant mangones gemmarum, recusant similiter et limae probationem.* ineptum est illud *quod in lamna ferri moratur.* sed non minus ineptum est quod ex libro Bambergensi, in quo *lamna* in *ima* depravatum est, nuper elicere sibi visi sunt, *quod in lima ferri moratur.* nam et *lima ferri* absurde dicitur, certe inutiliter, et addendum erat quale esset illud fragmenti in lima morantis experimentum et sequitur ut diversum experimentum limae probatio. scripsit Plinius *decussi fragmenti quod in lamna ferri uratur efficacissimum experimentum excusant mangones gemmarum.*

VIII. Isidorus Originum iv 7 34 haec scripsit, *satyriasis iuge desiderium Veneris cum extensione naturalium locorum: dicta passio a satyris.* post haec verba, quae similia sunt eis quae Caelius Aurelianus Cel. pass. iii initio capitis 18 dicit, in libris Gothicis addita alia sunt eaque ab illo argumento tam aliena ut adpareat ex docto aliquo libro excerpta et cum forte nulla alia charta ad manum esset in vacuam ex-

emplaris alicuius Originum marginem coniecta esse. edidit ea Arevalus t. III p. 566, Gothicos autem libròs, ut ex eis adparet quae t. I p. 320 leguntur, codices ecclesiae Toletanae dicit caractere Gothico exaratos. in his igitur Gothicis libris haec scripta sunt, *alexander historiographus ait vulscos* (al. *vulsos*) *quidam appellatos aiunt a vulsco antiphatele strigonis filio. fabius quoque sicolicis* (al. *sic colicis*) *profectos corrupto nomine vulscos ait dictos.* non dubitabimus haec ad Cornelium Alexandrum Polyhistorem et ad Q. Fabium Pictorem referre, quorum qui reliquias conquisiverunt non inciderunt in illam adnotationem. emendanda est autem hoc modo, *Alexander historiographus ait 'Vulscos quidam appellatos aiunt a Vulsco Antiphatae Laestrygonis filio.'* *Fabius quoque a Siculis profectos corrupto nomine Vulscos ait dictos.* Vulsci illius fabulosi memoriam non recorder me alibi reperire: sed totum illud commentum congruit cum ea opinione qua Formiae, Volschorum oppidum, Laestrygonum olim sedes fuisse putabantur; quam opinionem secuntur Cicero ad Atticum II 13, Horatius Carm. III 16 34, Ovidius Met. XIV 233. XV 717, Plinius Nat. hist. III § 59, Silius Italicus VII 376. 410. antiquior Homericarum fabularum interpretatio, cui iam Thucydides quodammodo obtemperavit VI 2, Laestrygonες in Sicilia conlocabat. fuisse autem qui Antiphatae patrem darent Sicanum (a quo Trinacriam adpellatam esse Sicaniam Stephanus Byzantius scribit p. 635 19 Mein.) Ioannis Malalae quantumvis inepta narratio docet p. 145 Ox., ἡ δὲ νῆσος αὕτη (Sicilia) ἦν μεγάλη πάνν, διηρημένη εἰς τρεῖς ἀδελφοὺς μεγάλους καὶ δυνατοὺς καὶ τὰ ἀλλήλων φρονοῦντας, λέγω δὴ εἰς Κύκλωπα καὶ Ἀντιφάτην καὶ Πολύφημον, υἱοὺς γεναμένους τοῦ Σικάνου, βασιλέως τῆς αὐτῆς νήσου. quodsi igitur non prorsus temere positum est quoque illud quo quisquis ista scripsit Fabii commemorationem verbis Alexandri adnexuit, videri poterit Fabius Volscos a Siculis Laestrygonibus repetiisse. nam etsi multo pervulgatior antiquitus erat fama Siculos ex Italia in Siciliam traiecisse, videntur tamen fuisse qui illinc potius eos in Italiam transmigrasse narrarent: certe Servius in Aen. I 2 haec habet, *Italus enim, rex Sicularum, profectus a Sicilia venit ad loca quae sunt iuxta Tiberim et ex nomine suo adpellavit Italiam.* sed intellego quam lubrica sit omnis opinatio in tam breviter tamque obscure repetita Fabii narratione. itaque de alia Fabianae narrationis non explicatione, sed quadam quasi umbra interpretationis nihil adicerem nisi Mommsenus me adhortatus esset ne omitterem quae ad causam aliquo modo pertinere viderentur. et expedient fortasse alii rem in qua ipse paene ni-

hil extricare potui. de Camilla, Volsca puella, Vergilius Aen. xi 841 s. haec dicit, *heu nimium, virgo, nimium crudele luisti Supplicium, Teucros conata lacessere bello*. adscriptum ibi hoc scholion est inter Serviana, *quidam huius loci longam expositionem tradunt: Volscos a Volscatibus Hylinis originem ducere, Exclytas autem, inter quos Amazones sunt, regionem Illyricam incolere. fuisse ergo supplicium Camillam dicunt, quae adversum Troianos arma tulerit, quibus maiores eius auxilium constat tulisse, id est Penthesileam*. in his Hylini non difficilem habent explicationem. Stephanus Byzantius p. 647 haec habet, quae adscripsi a Meinekio emendata, Ὑλλεῖς, ἔθνος Ἰλλυρικόν, ἀπὸ Ὑλλου τοῦ Ἡρακλέους καὶ Μελίτης τῆς Αἰγαίου τοῦ ποταμοῦ, ὡς Ἀπολλώνιος τετάρτῳ Ἀργοναυτικῶν. ἔστι καὶ πόλις Ὑλλη. τὸ ἐθνικὸν Ὑλλεύς καὶ θηλυκὸν Ὑλλής, ὡς αὐτὸς φησι, καὶ παρὰ Καλλιμάχῳ Ὑλλίς, ἀπὸ Ὑλλίδος Ἀργείας, μιᾶς τῶν νυμφῶν. ἢ ἀπὸ Ὑλλου τοῦ Ἡρακλέους καὶ Ἀθηανείρας. ἔστι δ' ὡς Φῶκος Φωκεύς, Αἰόλος Αἰολεύς, οὕτως Ὑλλος Ὑλλεύς. Ἀπολλόδωρος Ὑλλους τούτους γράφει, λέγων ἐν τῷ περὶ γῆς δευτέρῳ "ἐπὲρ δὲ τοὺς Ὑλλους Αἰβυρνοὶ καὶ τινες Ἰστροὶ λεγόμενοι Θρᾶκες." καὶ τὸ θηλυκόν, "Ὑλλίς πρόκειται χερρόνησος ἡλίχη Μάλιστα Πελοπόννησος, ὡς φασι.... πεντεκαίδεκα Πόλεις ἔχονσα παμμεγέθεις οἰκουμένας." ab Apollonio Rhodio Ὑλλῆς commemorantur Arg. iv 522 ss. Apollodori versibus usus est Scymnus v. 405 ss. Ὑλλείων χθόνα Dionysius perieg. v. 386 memorat. *peninsula Hyllis, circuitu c m. p.*, apud Plinium est Nat. hist. iii § 141. idem nomen apud Propertium i 8 26 restitui certa emendatione: quae non mea est, sed Lachmanni, *et dicam 'licet Autariis considat in oris, Et licet Hyllis; illa futura meast.'* sed Volscates illos in scholio non novi, neque magis novi Exclytas aut nomen eorum, quod corruptum esse videtur, emendare possum: recte autem in eiusmodi rerum vocabulorumque obscuritate a coniectura abstinerebimus donec scholia illa cum antiquis libris accurate conlata erunt. Amazones vero in Illyrica regione collocari non admodum miror. nolo quicquam pronuntiare de eo quod Plinius § 144 narrat, *ab Epidauro sunt oppida civium Romanorum Rhizinium Acruvium Butua Olcinium, quod antea Colchinum dictum est a Colchis conditum*: quamquam in mentem sane veniunt Κολχίδος γᾶς ἔνοικοι παρθένοι, μάχας ἄτρεστοι. venit autem in mentem etiam turpissimum mendum in scholiis in Clementem Alexandrinum p. 115 11 Kl., Ἀμαζόνες· ἔθνος Σκυθικὸν ἀνδρεῖον καὶ ἀνδρῶδες καὶ πρόσοικον τοῖς Κοίλοις, ubi Κόλχοις scriben-

dum esse patet. verum ut haec missa faciam, ulterius etiam fabulae promoverunt memoriam Amazonum. nam cum Horatius Carm. iv 4 17 haec dicat, *videre Raetis bella sub Alpibus Drusum gerentem Vindelici: quibus Mos unde deductus per omne Tempus Amazonia securi Dextras obarmet quaerere distuli, Nec scire fas est omnia*, immerito veteres grammatici a recentissimis vituperantur. Porphyrius hoc est scholion, *hi Vindelici sedibus ab Amazonibus eieci et ex Thracia in exilium se contulisse Alpiumque loca insedis dicuntur et quod potentissima in se tela secures Amazonum experti fuissent ipsos quoque usum earum in bello accepisse*. aliter Servius in Aen. i 243, *tutus: ideo tutus quia Raeti Vindelici ipsi sunt Liburni, saevissimi admodum populi, contra quos est missus Drusus. hi autem ab Amazonibus originem ducunt, ut etiam Horatius dicit, Quibus mos et quae secuntur*. Serviana cum Illyricis Amazonibus facili opera consociantur. nescio sane utrum Servius an Porphyrio veriora protulerit, sed illud scio, Horatium illic de Amazonibus nihil dicturum fuisse nisi Vindelicos cum Amazonibus aliqua fabula aliquodve carmen coniunxisset. puto autem egregium hominem Ioannem Matthiam Gesnerum egregie intellexisse quid Horatium ut illa carmini suo admisceret permoverit: cuius sententiam cum hodie contemni video consolor me Godofredi Hermanni adsensu, quicum ante multos annos de Horatii carmine ita interpretando conloqui memini. egregie igitur mihi videtur Gesnerus intellexisse morderi ab Horatio Amazonidem Domitii Marsi. quam recte lyrico carmini cuius grandior est spiritus alius poetae insectationem inseruerit non quaero, sed fecit illud Graecorum poetarum exemplo: de qua re satis est commemorare Pindaricum illud *ἀρᾶντα γὰρ ἔστον*. imitatur autem Graecos omnibus modis, veluti parmulam se non bene reliquisse non dixisset nisi memor fuisset Archilochi et magis etiam Alcae. illos non curo qui dum libidinem magis quam rationem secuntur ab Horatio quidquid ipsis displicet abiudicant. quod autem vir quidam eruditissimus negavit ex noto Martialis epigrammate iv 29 recte concludi Amazonidem Marsi epicum carmen fuisse, mihi quidem vanum videtur istud oraculum. Martialis enim ut rara doceat gratiora esse hoc utitur exemplo, *saepius in libro numeratur Persius uno Quam levis in tota Marsus Amazonide*. itaque opponit uni Persii libro Amazonidis, longi carminis, libros complures: velim autem scire quidnam Amazonis pluribus libris conscripta potuerit esse aliud quam epicum carmen. concideret vero ingeniosa Gesneri opinio si recte Nipperdeus in Taciti Ann. vi 47 Amazonidem ad Vibium Marsum referret, quem Tacitus inlustrem studiis dicit, poe-

tam non dicit: putat enim Nipperdeius Domitium, clarum poetam, a Martiale non potuisse reprehendi. sed arbitror levem poetam et epigrammaticum clarum longo et severo carmine epico displicuisse propterea-que *levis* illud a Martiale additum esse. verum ut ad Servianum scholion Fabiumque Pictorem redeam, memorabile est a Plinio § 141 inter Delmatiae oppida enumerari *Siculi*, in quem locum *divus Claudius veteranos misit*: hoc enim, *Siculi*, antiqua exemplaria habent, quod vulgo scribitur *Sicum* sumptum est ex Ptolemaei Geographia II 16 4; verum rectissime Mommsenus intellexit apud Ptolemaeum potius *Σικοῦν* mutandum esse in *Σικοῦλι*, id est *N* in *AI*: consimili autem nominis forma *Σλοῦππι* est inter Liburniae oppida a Ptolemaeo § 9 commemoratum. denique a Plinio § 143 inter Delmatiae populos referuntur *Siculotae*, a Ptolemaeo § 8 *Σικουλώται*. haec nomina fabulis fortasse originem dederunt quibus Volsci a Siculis Illyricis repeterentur, neque, ut Mommsenus censet, mirandum est si fuerunt qui Volscos, Romani nominis hostes, ab aliis Siculis quam ab illis qui Latium olim incoluisse putabantur originem accepisse fabularentur. uberius haec fortasse enarrata erant in illa longa expositione quam Servianum scholion contractam exhibet. suspicor etiam ad illam expositionem olim pertinuisse quae Originibus Isidori in Gothicis libris adscripta sunt: utitur enim Servius alibi et Alexandri Polyhistoris et Fabii Pictoris auctoritate. sed nunc a longo ac tenebricoso itinere tandem respiro, putoque etiam lectores siqui fuerint libenter esse respiraturos.

IX. Errorem commisi cum in Catalectis Vergilii aliorum iudicio nimis confusus *Syronis* scripsi, sed non eo peccavi quod non scripsi *Scironis*. hoc Scironis nomen retribuendum esse philosopho Epicureo quem Vergilius audivit Caroli Halmii opinio est, qui ad Lucillum Ciceronis § 106 haec adscripsit, 'nobis vera forma videtur *Sciron*, quam editores etiam ex Donati vita Vergilii § 79 et ex Catalectis Verg. VII 9 et X 1 codd. spretis expulerunt. in Cic. epist. ad famil. VI 11 2 *Syronem* editur; sed Baitero teste codex Mediceus exhibet *sironem*.' videamus quae sit librorum memoria. in Lucullo Ciceronis antiquior liber Leidensis *seiron* habet, alter Leidensis et Erlangensis *sciron*, Gudianus *seron*, quod autem olim scribebatur *Scyron* factum est nulla veterum librorum auctoritate. quid in epistula liber Mediceus habeat ipse docet Halmius. in libro de finibus II § 119 *sironem* est in antiquis exemplaribus, *Syronem* et *Scyronem* auctoritate carent. in Vergilii Catalectis liber quo usus sum Bruxellensis, quo neque melior neque antiquior adhuc inventus est, in priore carmine *sironis* praebet, in altero *fironis*,

quo errore illam nominis formam patet esse depravatam. ex Donati vita Vergilii omnino nulla nominis species quam veteres libri dederint expulsa est: nam philosophi Epicurei commemoratio ad eam vitae partem pertinet quam non habere scripta exemplaria Reifferscheidii diligentia constat. in Phocae autem vita Vergilii quod Scaliger et Pithoeus scripserunt *Sironem* in antiquo exemplari invenerant. Servium in Vergilii Buc. vi 13 *Sirone* et *Sironem*, in Aen. vi 264 *Sironem* scripsisse satis ostendunt quae de scriptis libris commemorantur. denique in vetustissimis illis scholiis Veronensibus in Buc. vi 9 *sirona* scriptum est. quare cum sequenda sane sit antiquorum librorum auctoritas, Siron dicendus est philosophus. neque enim *seiron* illud Leidensis libri aliud est neque *sciron* aut *seron* aliunde natum esse videtur quam ex ipsa illa Graecanica nominis forma. erat autem Graecum nomen Σείρων, cuius exemplum est in Thesauro Stephani.

Commemoravi supra antiquum exemplar carminis Phocae. codex est bibliothecae imperialis Parisiensis numero 8093. quem codicem Merilius in Confusaneis suis (*Mélanges archéologiques et littéraires par mr Édélestand du Ménil*) p. 451 fabulatur carminis non tantum illos quos omnes novimus versus hexametros cvii continere, sed clxxxii. nequis homini falsa temere adfirmanti credat testor fide Caroli Benedicti Hasii schedam codicis ipso illo versu 107 finiri (*hic ubi languores et fata minacia sensit*), proximam schedam olim alio pertinuisse versusque qui in ea scripti sunt a Phocae poemate prorsus esse alienos. quod igitur servati sunt illi quos habemus eius versus factum est servato uno illo exemplari, quo Scaligerum et Pithoeum usos esse adparet. neque magna est reliquorum iactura. nam recte statuitur Phocam e Donato totum pendere. est autem ubi Donatum non recte intellexerit. nam cum Donatus haec de Vergilio narret, *poeticam puer adhuc auspicatus in Ballistam, ludi magistrum, ob infamiam latrociniorum cooper-tum lapidibus distichon fecit, 'monte sub hoc lapidum tegitur Ballista sepultus. Nocte die tutum carpe, viator, iter,' Phocas ea ita exornat, tum Ballista rudem lingua titubante receptum Instituit primum, quem nox armabat in umbris Grassari solitum; crimen doctrina tegebat. Mox patefacta viri pressa est audacia saxi. Incidit titulum iuvenis, quo pignora vatis Edidit: auspiciis suffecit poena magistri. Monte sub hoc lapidum* et quae secuntur: male enim argutus est Reifferscheidius cum ea quae secuntur secludit Phocamque minus quam fuit ineptum reddere studet. videntur autem mihi recte sensisse qui olim in Donati vita scripserunt *ludi gladiatorii magistrum*, id est recte interpretati

esse *ludi magistrum*, nam addere sane nihil debebant. quodsi litterarii ludi magister Ballista fuisset, vel puerum inde aliquid acuminis epigrammati suo recepturum fuisse putaverim. et videtur Ballista gladiatoris satis conveniens nomen esse. quamquam siquis dicat hoc esse nimium sapere, nescio sane quomodo me defendam. in inscriptione Canusina apud Mommsenum IRN. p. 38 n. 673 M'. Aquillius Ballista aliquis invenitur.

X. In Fragmentis, ut iuris periti locuntur, Vaticanis § 129 s. haec scripta sunt, *valetudo quoque mala praestat vacationem, si talis sit ut ostendat eum ne quidem rebus suis administrandis idoneum esse. item. si quando autem huiusmodi valetudo adfirmetur, inspectio praetoris necessaria est. sive autem quis arthriticus sit sive posicus sive epilepticus sive orbus et his similia, excusantur.* cum *posicus* nihili sit, excogitata olim sunt vocabula quae propter significationem morborum ad excusationem minime idoneorum non magis ferri possunt. unus Mommsenus prompsit aptum rei vocabulum, *podagricus*. sed inde non potuit nasci *posicus*. traiectionis potius duabus litteris scribendum est *psioicus*. Ulpianum, ex cuius libro singulari de excusationibus haec sumpta esse Mommsenus docuit, facile credam scripsisse *psoadicus*, excerpta ista minus recta vocabuli forma non dedecet. de *psoadicis* satis est adscribere quae Caelius Aurelianus habet Tardarum passionum v 1 6, *psoadici vero clunium dolore afficiuntur et tardo motu, ut se renitente dolore nec inclinare valeant ac dolentius subrigant.*

XI. Apud Diomedem in Arte grammatica p. 498 P. in vetustis libris haec leguntur, *vocales (versus) sunt qui alte producta elocutione sonantibus litteris universam dictionem inlustrant, ut est illud paconia non meo oceano hyperion fulgorat euro*: secuntur tres alii versus. qui olim hos quattuor versus Varroni Atacino attribuerunt neglexerunt vel ignorarunt potius antiquorum exemplarium litteras, quibus aliud nomen contineri manifestum est. itaque Henricus Keilius posuit quod ego suaseram, *ut est illud Paconianum Eoo Oceano Hyperion fulgorat Euro*. initium versiculi siquis aliter restituerit, non repugnabo; quamquam ne nunc quidem veri dissimile habeo quod scripsi. sed poetae nomen me recte adsecutum esse puto, nisi quod simplicius ac rectius scripsissem *Paconiani*. videor enim mihi iam posse docere quis ille fuerit Paconianus. Tacitus ab excessu divi Augusti vi 39 inter res anno ab u. c. DCCLXXXVIII gestas haec narrat, *nec dispare Trebelleni Rufi et Sextii Paconiani exitus: nam Trebellenus sua manu cecidit, Paconianus in carcere ob carmina illic in principem factitata strangulatus*

est. pessimum hominem fuisse ea docent quae antea (cap. 3) a Tacito narrantur, poetam non optimum vocales illi versiculi produnt. nam ut alii eos homini adscribamus nulla videtur esse causa.

XII. Marulli mimographi pauca habemus verba a Servio bis commemorata, in Buc. vii 26 et in Aen. vii 499. meminit eius Hieronymus contra Rufinum ii 20 (t. ii p. 514 Vall.), *quasi mimum Philistionis vel Lentuli ac Marulli stropham eleganti sermone confictam.* ab Hieronymo, ut pii illi homines haud raro furtis doctrinae speciem quaerunt, eius notitiam sumpsit Marius Mercator p. 10 Bal., *vulgares tu dignus audire acclamationes, unus tu; unus Philistion, unus Latinorum Lentulus, unus tibi Marullus comparandus: namque Martialem et Petronii solus ingenia superasti.* quo tempore Marullus vixerit docet Iulii Capitolini narratio in M. Antonino philosopho cap. 8, *adepti imperium ita civiliter se ambo egerunt ut lenitatem Pii nemo desideraret, cum eos Marullus sui temporis mimographus cavillando inpune perstringeret.* addo quod ignorare videntur qui Latinarum litterarum historiam tractant. Galenus *περὶ ἀνατομικῶν ἐγχειρήσεων* vii 12 (t. i p. 182 Bas., iv p. 161 Chart.) haec habet, *εἰ δὲ καὶ περιλάβοις ἔτι δεσμοῖς τὸ τραῦμα, καὶ τροφήν ὅψει προσφερόμενον ἢν πεινῆσαν τύχη καὶ πῖνον ἢν διψήσῃ. καὶ τί θανααστόν; ὅπου γε ὁ Μαρύλλου τοῦ μιμογράφου παῖς ἐθεραπεύθη καὶ ζῆν νῦν ἔτι, καίτοι γυμνωθείσης αὐτῷ ποτε τῆς καρδίας.* ad eundem puerum pertinere puto quae Galenus narrat *περὶ τῶν Ἱπποκράτους καὶ Πλάτωνος δογμάτων* i (t. v. p. 78 Chart.), *ἀλλὰ κἀκείνου τὸ συνεχές τῷ στέρνῳ διεσεσθήπει καὶ ἦν οὕτω σαφῶς θεάσασθαι τὴν καρδίαν ὥς κὰν ταῖς τῶν ζώων ἀνατομαῖς ἐπειδὰν ἐκόντες ἀναγυμνῶμεν. τὸ μὲν οὖν παιδάριον ἐσώθη, σαρκωθέντων τε τῶν περὶ τὸ στέρνον καὶ συμφύντων ἀλλήλοις καὶ τοιοῦτον ἐπίθεμα γενομένων τῆς καρδίας οἷόν περ ἡ ἔμπροσθεν ἦν κορυφῇ τοῦ χιτῶνος. καὶ οὐ χρὴ θαναμάζειν εἰ γυμνωθείσης τῆς καρδίας ἐσώθη τὸ παιδάριον etc.*

XIII. Ex codice illo Einsidelensi qui praeter alia inscriptionum Latinarum syllogen antiquissimam et descriptionem urbis Romae continet Theodorus Mommsenus anno MDCCCLIV in Museo Rhenano p. 298 hoc distichon protulit,

*Iustius invidia nihil est, quae protinus ipsum
corrodit auctorem excruciatque animam.*

sumptum est ab Hieronymo, in cuius libro iii in epistulam ad Galatas

cap. 5 (t. vii p. 508 Vall.) haec legimus, *pulchre quidam de neotericis Graecum versum transferens elegiaco metro de invidia lusit dicens*

*iustius invidia nihil est, quae protinus ipsum
auctorem rodit excruciatque animum.*

minor versus sic scriptus est recte: nam brevis in caesura syllaba apud neotericum poetam nullam habet offensionem. possum autem etiam Graecos versus monstrare quos ille Latinos fecit. epigramma est ἀδέσποτον Anthologiae Palatinae xi 193,

Ὁ φθόνος ἐστὶ κάκιστος, ἔχει δέ τι καλὸν ἐν αὐτῷ·
τήκει γὰρ φθονερῶν ὄμματα καὶ καρδίην.

similia apud alios inveniuntur, quorum dicta partim congegessit Ioannes Stobaeus Anthologii capite xxxviii. eiusmodi animadversione cum laus nulla parari possit (neque enim tenaci memoria gloriabitur nisi stultus), sed litteris quantumvis tenuis adferatur utilitas, sine invidia erit si addidero versum a Beda de tropis p. 611 prolatum, *pervia divisi patuerunt caerula ponti*, in quo de Ennio non debebat cogitare Halmius, cum Beda in toto illo libello pagani nihil commemoret, versum igitur illum esse Caelii Sedulii i 120.

XIV. Non uno nomine utile atque adeo necessarium est scire quorum scriptorum veterum doctiores homines medio quod dicitur aevo habuerint notitiam. itaque operae pretium facturus esse mihi videor si ex eis quae inde a longo tempore ad hanc rem pertinentia collegi memorabilia paullatim proferam. sed nunc quidem pauca tantum volo huc congerere.

Varronis libros de lingua Latina legisse Hrabanum Maurum non video notum fuisse eis qui de Varrone commentati sunt. sed certa res est. quippe Hrabanus de computo cap. 3, in Baluzii Miscellaneis t. i p. 9, haec habet, . . . *centussis. post quem numerum teste Varrone non componuntur cum asse numeri.* quae hausta sunt ex Varronis libro v, ubi haec leguntur p. 170 Sp., . . . *reliqua conveniunt, quod est ut tricessis proportionem usque ad centussis, quo maius aeris proprium vocabulum non est.* neque enim potuit Hrabanus aliunde sumere quae nemo alius excipserat.

Catulli carmina saeculo decimo Ratherius legit, saeculo quarto decimo Petrarcham habuisse alias docui, medio inter utrumque tempore omnino videntur delituisse. nam quod Ioannes Sarisberiensis in Metalogico i 24 Catulli illud adfert *munus dat tibi Sylla litterator*, nempe sumpsit a Martiano Capella. itaque memorabile est quod proferam. versiculum illum carminis xxxvii *cuniculosae Celtiberiae fili* Priscia-

nus bis commemorat, Institutionum v 77 et vii 22 (p. 673 et 741 P.). utrobique libri in hoc vitio conspirant, *celtiberosae celtiberiae fili*, aut in mendis quibus ipsum illud *celtiberosae* amplius depravatum est. sed codex Darmstadiensis saeculo xii scriptus, quo Hertzius usus est, utrobique *cuniculosae* praebet. quare putandum est aut verum vocabulum usque ad hunc librum devenisse ex antiquiore exemplari quam ex quo ceteri libri omnes deducti sunt aut fuisse saeculo xii vel paullo antea non indoctum hominem qui quae Priscianus attulit cum Catullianorum carminum aliquo exemplari compararet.

Henricus Iordanus in praefatione quam scriptoribus historiae Augustae addidit p. xxv narrat me sibi indicasse tenuem horum scriptorum memoriam extare apud Sedulium Scotum in Maii Spicilegio Romano t. viii p. 43, quippe qui videretur Maximinorum vitam legisse. scilicet cum haec scriberet ego aberam Berolino, Maii autem librum nancisci non potuit: habent enim libri hoc etiam fatum ut non numquam non possint reperiri. adscribam igitur ista, quae non tenuem memoriam continere dixeram, sed evidentem. Sedulius in libro de rectoribus Christianis (quem librum videri potest intra annos dccc et dcccxl, fortasse anno dcccxiii, scripsisse) cap. 14 haec habet, *quodsi quis singulari fortitudine excellens ob hoc singula non timeat, idem multos necesse est caveat. nam qui ab uno vinci non potest interdum a multis vincitur. elephas grandis est et occiditur, leo fortis est et occiditur, tigris fortis est et occiditur*. qui haec contulerit cum eis quae in Iulii Capitolini Maximini duobus cap. 9 leguntur, non dubitabit illa excerpta esse a Sedulio. ante illa Sedulii verba legimus haec, *praesumebat et silurus piscis quod hamum sibi nemo iaceret, nemo tenderet retia et, si incidisset, omnia disrumperet: et tamen fuscinam non evasit*. falleretur siquis fabulam Caroli tempore a vulgo narrari solitam in his se deprehendere putaret: sumpta enim omnia sunt ex Ambrosii Hexaemero v 5. sed Caesarum vitas Sedulium legisse non uno illo argumento constat. cap. 6 p. 19 haec scribit, *unde illa Antonini imperatoris praecipua semper in consiliis fuit sententia 'aequius est ut ego tot et talium amicorum consilium sequar quam ut tot et tales amici meam unius voluntatem sequantur.'* eisdem verbis Antonini Philosophi sententiam Capitolinus in vita eius cap. 22 perscripsit.

Grillium aliquem ad Virgilium de accentibus scripsisse olim notum erat ex Prisciani Institutionum i 47. eiusdem, ut videtur, Grillii amplum commentarium in Ciceronis libros de inventione Halmius in lucem reduxit eiusque partem in Rhetoribus suis Latinis edidit. Rhetor-

rica Grilli, qui idem videtur liber esse, Dionysium de Burgo usum esse in Declaratione Valerii Maximi Hertzius adnotavit Prisciani t. 1 p. 36. addo eiusdem scriptoris memoriam inveniri in Benzonis episcopi Albensis ad Heinricum IV imperatorem libro 1, ubi haec leguntur (in Pertzii Script. t. XI p. 599),

*Maro vates Mantuanus, Lucanus et Statius,
Pindarus seu (f. sive) Homerus et noster Horatius,
Grillius, Quintilianus, comicus Terentius
formidassent regis opus, quo nil excellentius.*

adscribitur ibi esse in codice *Grillius*, sed legendum videri *Gellius*. coniecturam vilem et falsam protulerat iam Arntzenius in Aratore suo p. 152.

M. HAUPT.

ZU ANAKREON.

Im Anhang zu Lachmanns Babrius S. 135 und in Bergks Poetis lyricis S. 792 steht als ein trochäischer Skazon des Anakreon

διὰ δέρην ἔκοψε μέσσην, καὶ δὲ λῶπος ἐσχίσθη.

Ich will hier mittheilen was Gottfried Hermann einmal für mich aufgeschrieben hat.

‘In dem Scholion zu II. XVII 542 ist zu schreiben καὶ Ἀνακρέων “διὰ δέρην κόψε μέσσην” καὶ “καὶ δὲ λῶπος ἐσχίσθη.” Das zeigt klar Eustathius S. 1001 38, dessen Worte Bergk zum Anakreon S. 238 nur zur Hälfte anführt, φέρονσι δὲ εἰς ὁμοιότητα καὶ Ἀνακρέοντος τὸ “καὶ δὲ λῶπος ἐσχίσθη,” ἀντὶ τοῦ κατεσχίσθη τὸ ἱμάτιον, καὶ τὸ “διὰ δὲ δειρὴν ἔκοψε μέσσην.”

Das townleysche Scholion in Cramers Anecd. Par. III S. 287 stimmt mit dem vettorischen überein. Aber Hermanns Sonderung zweier Bruchstücke muss auch ohne den Eustathius einleuchten. Denn wer gesagt hat ‘er hieb den Hals mitten enzwei,’ der kann ohne Albernheit kaum fortfahren ‘das Gewand aber zerriss.’

M. H.